

Fecho diez e ocho dias de febrero, año del nascimiento del nuestro salvador Jhesuchristo de mill e trezientos e ochenta e ocho años. Yo, Diego Garçia, la fize escribir por mandado de nuestro señor el rey. Nos, el rey. Testigos que vieron e oyeron leer e conçertar el dicho treslado del dicho alvala del dicho señor el rey: Garçi Perez, Gonçalo Ferrandez, carpenteros, e Hamet, fijo de don Yçaig Alfag, vezinos de Segovia. Fecho este treslado en la çibdat de Segovia, veynte e ocho dias de agosto, año del nascimiento del nuestro señor Jhesuchristo, de mill e trezientos e ochenta e nueve años. Yo, Johan Sanchez, escrivano publico a la merçed de mi señor el rey en la çibdat de Segovia, vy e ley el dicho alvala del dicho señor rey onde este treslado fize sacar e lo conçerte con el, e fize aqui mio signo en testimonio. Johan Sanchez.

(237)

1388-IV-3. Burgos.— Carta de Juan I referente a los regidores del Concejo. (A.M.M., C.R. 1384-91, 155, r.-v.)

Don Johan, por la graçia de Dios, rey de Castiella, de Leon, de Portugal, de Toledo, de Gallizia, de Sevilla, de Cordova, de Murçia, de Jahen, del Algarbe, de Algezira, e señor de Lara, e de Vizcaya, e de Molina, al conçeio e cavalleros e esçuderos e ofiçiales e omes buenos de la noble çibdat de Murçia, salut e graçia. Fazemos vos saber que viemos vuestra petiçion en que nos enbiastes dezir que en tienpo del rey don Alfonso, nuestro ahuelo, que avia en esa çibdat treze regidores e non mas; e que despues, el rey don Enrrique, vuestro padre, que Dios perdone, que puso diez e seys con tal condiçion, que quando alguno dellos finase, que los otros esleyesen çinco omes buenos de la dicha çibdat, los que entendiesen que fuesen mas pertenesçientes para ello, e que ge lo enbiasemos dezir por quel escogiese dellos uno, qual su merçed fuese, para el dicho ofiçio que asi vacase. E que agora, pocos dias ha, que finara Pagan Doluja, que era uno de vos, los dichos regidores; e que veyendo vos que non conplia a nuestro serviçio, nin a pro desa çibdat aver en ella mas de treze regidores, segund que lo fueron en tienpo del dicho rey don Alfonso, nuestro ahuelo, que dexastes de fazer la dicha eliçion, lo qual dezides que fiziestes por quanto despues quel dicho rey nuestro padre ordeno e mando que oviese y los dichos diez e seys regidores an fallèsçido muchos omes buenos desa çibdat por mortandez e por otras pestellençias que an acaesçido en esa tierra; e que de los omes onrrados que agora en ella ha, afuera de los dichos regidores, que son menester muchos dellos para los ofiços que se reparten y, en la dicha çibdat, por el dia de Sant Juan de junnio, e por ende que nos pediades por merçed que lo oviesemos por nuestro serviçio, e mandasemos que fasta que los dichos regidores fuesen



tornados en treze, segunt que eran en tiempo del dicho rey don Alfonso, nuestro hahuelo, e de aquellos finase alguno dellos, que non fiziesedes el dicho esleymiento salvo desque fuesen tornados en el dicho numero de treze, e porque entendieades que en ellos avria azaz regidores para esa dicha çibdat. Sabet que nos plaze, e por esta nuestra carta vos mandamos que lo fagades e cunplades asi, e que fasta que los dichos regidores sean tornados en el dicho numero de treze, e de aquellos finare alguno dellos, commo dicho es, que non reçoibades en el dicho ofiço del dicho regimiento a otro alguno, pues dezides que cunple asi a nuestro serviço e a pro desa dicha çibdat, segund sobredicho es. E non fagades ende al por alguna manera, so pena de la nuestra merçed.

Dada en Burgos, tres dias de abril del año del nascimiento del nuestro salvador Jhesuchristo de mill e trezientos e ochenta e ocho años. Nos, el rey. Yo, Alfonso Royz, la fiz escrivir por mandado de nuestro señor el rey.

(238)

1388-IV-13.- Albalá de Juan I relativo a recaudación de servicio. (A.M.M., C.R. 1384-91, Fol. 154, v.)

Nos, el rey de Castiella, de Leon, de Portogal, mandamos a vos, Johan Moraton, nuestro escrivano e escrivano otrosi, del conçeio de la çibdat de Murçia, que los mill e quinientos florines e quarenta e dos marcos e medio de plata quel conçeio de la dicha çibdat convusco nos enbio por nos fazer serviço, en cuenta del pecho que a la dicha çibdat cabe a pagar en el serviço de las doblas que por los de los nuestros regnos nos fue otorgado en las cortes que fiziemos en Briviesca el año que paso, que los dedes e entreguedes a Johan Sanchez, de Vergara, vezino de Burgos, que los ha de reçoibir por nos. E tomad su carta de pago en commo los ha reçoibido de vos; e con ella e con este nuestro alvala, mandamos que sean reçoibidos en cuenta al dicho conçeio e a vos en su nonbre, e descontados al dicho conçeio de lo que montare en las doblas e maravedis que la dicha çibdat nos ha de dar del dicho serviço, commo dicho es.

Fecha, treze dias de abril, del nascimiento del nuestro señor Jhesuchristo de mill e trezientos e ochenta e ocho años. Yo, Alfonso Royz, lo fiz escrivir por mandado de nuestro señor el rey. Nos, el rey. Gonçalo Garçia.

